



Trump-i Alaska senden nung
Zelenskyy jaoktsü asadangtar

Al Nassr nung Inigo
Martinez denogo

VOL. XXII ISSUE NO. 297 (ADOK 297)

DIMAPUR

TENTONÜ (MONDAY)

LUROI (LUROI) 11, 2025

₹ 5.00

Nübur asoshi CP tasenba den teka amteper inyaktsü: WSH

Dimapur, Luroi/August 10 (TYO): Dimapur, Chümoukedima aser Niuland district tem awajemba Police Commissionerate indang Commissioner of Police mapa agizükba asoshi Aotula T Imchen, IPS nem tenüngsang agütsür, ta Deobarnü Westrn Sümi Hoho (WSH) sangdong ka ajanga ashi.

La service record aser lenir ka ama inyaktsüb sempet tajung aliba ajanga Commissionerate kübok district asem nung nüburtem kumzüka ayuba, security aser lirumedema aliba nung taki tashi itshitsü tamang akar, ta WSH-i ashi.

Ajak asoshi ozüng kasa amshitsü, nüburtem nem temulung lemtetdaksütsü aser lar indang jurisdiction kübok nübur ajunga sunepa yutsütsü la dak tangatetba tajung aliba pela agizüker.

Commissioner of Police tasenba den tajungtiba nung amalitep akatsü aser tesunep, ochi obendang aser nübur ajungtsü mechi inyakba nung la den yariteptsü WSH temulungtetba nung lir. Asen lokti ajungtsü asoshi külemi teka amteper inyaktsü yongya atar, ta WSH sangdong ajangasa ashi.

Manipur: Churachandpur nung menoknok anak

Guwahati, Luroi/August 10 (Agencies): Deobar nikongdang Manipur state kübok Churachandpur nung menoknok magnitude 3.4 anak, ta National Centre for Seismology (NCS) ajanga ashi.

NCS ajanga social media X nung sangdong ka agütsüba nung, menoknok ya nikongdang 2:16 ako nung anak aser ali

telunglen kilometre 12 tarok nungi adok ta ashi.

Iba menoknok ya latitude 24.35°N aser longitude 93.54°E nung anak, anungji Churachandpur ya tiyong sür anak ta jangjar.

Ajisüaka iba osang züluba mapang tashinung ki o jen raksaba mesüra nisung asü-amaba meliasü.

Dr. Gayatri Gogoi-i Blackbuck Pioneer Research Award 2025 nguogo

Dibrugarh, Luroi/August 10 (Agencies): Medical Dialogues aser National Medical Forum lungjemer Delhi nung deobarnü sentong ka agidang Assam Medical College and Hospital (AMCH) nung Associate Professor aser ICMR-Regional Medical Research Centre, North East nung Adjunct Researcher, Dr. Gayatri Gogoi nem Blackbuck Pioneer Researcher Award 2025 sempet agütsüogo. Cancer research nung lai shilem tulu agiba asoshi iba konang tetushi ya agüja liasü.

Iba sempet ya parnoki Research Summit nung agütsü, kong Dr. Abhijat Seth, Chairperson of the National Medical Commission, aser Prof. Ashok Puranik, Executive Director of AIIMS Guwahati nungera dena liasü.

Iba sempet agütsütsü asoshi tetendanger temya former Director General of ICMR, Dean of Maulana Azad Medical College, Head of Cardiology at PGI Chandigarh, aser India



Dr. Gayatri Gogoi

tesem balala nungi tematiba doctor tem liasü.

Dr. Gayatri Gogoi yagi research aser academics nung dangar dak alakteta inyakba atema kisüng masü saka cancer agi shiranger aser kinunger temyariba nunga shilem tajung agiba yong national awards aika ngua lir.

Lai North Carolina, USA nungia international award for Excellence in Cancer Care ngua lir.

La indang medical textbooks, peer-reviewed journals nung research publication 50 dak tema, book chapters ajanga shilem tulu agia lir aser American Association for Cancer Research, International Fellow of the College of American Pathologists amala nunga züngsem aser Genomic Consortium of North East India indang Chairperson tashi inyaka lir

La aser lar teloki research projects ti renemogo, pongu tang teinyakdak lir, koba IISc Bangalore, AIIMS Delhi, IIT Guwahati, Tezpur University aser ICMR North East amala den lungjemer inyaker.

Pratishruti Cancer and Palliative Trust nung honorary member ka ama lai community-oriented projects aika yanglua tang tashi takok nung otar.

AIIMS Delhi, ICMR, Apollo Hospitals aser Medanta ama mozüki tajungtem nungi doctors aser scientists tem den külemi Pioneer Medical Researcher Award angur Northeast India nungibo Dr. Gayatri ya kisüng lir.

NSCN-IM ajanga Naga nunger mashi leni anisar: WC, NNPGs

Dimapur, Luroi/August 10 (TYO): NSCN-IM shilem aliba agreement kecha nunga shilem agütsü tejangraba onoki kodanga lemsatepa mali, ta WC, NNPGs sangdong ka ajanga ashi.

Stakeholders ajunga ajuruteptsü asoshi "Common Draft" ka alitsü nüngdaker ta jembiba mapang ka lir. Ibai Naga nunger ajunga asoshi solution bener arutsü atema Government of India (GoI) ajanga tenzükba inyakyim ka lir ta ajaki metettsüla, ta sangdong ajanga ashi.

Iba draft yagi November 17, 2017 nung zülutepba Agreed Position nung timtem magütsütsü asünungbo ajungtsü ta WC, NNPGs-i principle nung mulunga agizüka lir, kechiaser otsütsütsü agreement ibai (Agreed Position) dang lir, kong asen Naga nunger tarutsü tia asoshi telemtetba agütsü asen dak temeden aliba meja-meja tuteta shia lir.

Forum for Naga Reconciliation (FNR) ajanga Naga nunger teloktem tsüngta Reconciliatory Agreements - Covenant of Reconciliation (June 13, 2009), Naga Concordant (August 26, 2011) aser Lenten Agreement (March 28, 2014) zülutepba asoshia pelaba agütsütsü tim.

Tia maka NSCN-IM lenirtemi kibur tejangja ama sayutsü aser New Delhi mesüzüktsü atema kisüng item agreements ya amshi. GoI-ia kanga arsanga inyak, kechiaser FNR, Apex

Tribal bodies, arogo mesüra civil society telok nungi stakeholders kata medeni NSCN-IM delegation Delhi-i oa August 3, 2015 nü Framework Agreement (FA) ya zülutep. Parnoki ashi ama, iba sülen atalokba ajaki kanga junga meteta lir, ta WC, NNPGs sangdong ajanga ashi.

Iba document nung meyongnem magütsüdang Naga kin kata dena shisa agitepba khenyongi meliasü. Tanüa Naga nungeri parnok yimden ken o jembishinüba chichiba junga meteta mali. Iba yongi lisopur Naga nunger, akhi mapang nungi kibur temi FA ya parnok indang ama mezüngshir, ta ashi.

'NAGALIM' ojang ya bilemdangang, asangsang masü, mapet aser Naga nunger puti otsü tapaktem nung mali, iba yongji FA headline nunga NAGALIM masü 'NAGALAND' ang amshia lir.

Tanü item FNR-i yaria zülutepba agreement ajunga ajaras lir. Framework Agreement ya kechiba Naga nunger matsüngdang pokbaa meshitettsüsa miim onük ka akum ta ali telung nungi nisung teret tuteta adoker. Tetenzük nungi ibai NSCN-IM set-up nung teshimtet kar asoshi 'exclusive closed-door subject' ka ama yanglua lir. Parnok asoshi 'inclusive Naga political solution' ya atakatem ka lir, ta sangdong ajanga ashi.

Naga nungeri FA kanga junga meteta kumogo.

NSCN-IM indang Flag aser

Constitution nung taginüba shidakbaji ya lir - ibai insurance policy ka amai lir, ibai Ukhrul aser tesem balala nung rongsen bendentsü asoshi Nagaland indang rongsen tanen makai belentsü 'emotional tool' ka lir. Political solution nung shilem ka ama constitutional guarantee asoshi jembishinüba nung tajangzük atema amshir. Intangki reserve forest stretch aser temeket tesemtem belentsüba, Manipur nungi Naga nunger jila ka adoktsü atema. Political arrangement tasen ajanga Tangkhul nunger züngsem tejen temi yimten aser administrative tashi amshia ketdang asütsü par sentong lir. Yimjak nung sangdongtsü yutsür, iba yimten ken o jembishinü aser inyakyim ya Nagaland state nungi par civil aser military workers tem danga melemsateper, ta WC, NNPGs ajanga ashi.

Sübok nung iba ama sentong tulu yur, NSCN-IM lenirtemi WC, NNPGs aser Agreed Position ya lendong timtem lir ta tai tongloktsür. Tawa NSCN-IM indang Chairman nem sangdong ka agütsüdaksü. Pai ashiba ama Agreed Position aser FA ya meta agi pilar aser Agreed Position yagi tarutsü nung GoI aser Naga nunger tesendaktep atema blueprint agütsür saka FA ya mesangdongba document ka lir, koba Naga nungeri magizüktsü ta meteta lir.

Naga nunger ajunga sentong nung nisung ka kija indang

sentongtem mamshitettsü. Pei asoshi kisüng bilemer temi Naga nunger tarutsü putu asoshi mebilemtettsü.

Intangki reserve forest ya Naga nunger meyong aser GoI-i Manipur nungi NSCN-IM züngsem nem Pan Naga Hogo (PNH) akumbok nung kecha yimya nunga magütsütettsü, ta GoI-i IM lenirtem nem metetdaksüogo.

WC, NNPGs ajanga iba sentong jelia metetba yong ken o jembishinüba mapang tuteta yutsü aser solution sülen kecha tensa tia nunga Intangki reserve forest nung mokongshitsü nenshia ashi. WC, NNPGs ajanga FA nung aibelen ariba metongshitsü. Anungji NSCN-IM ya solution atema masü ta tejangja sayur. NSCN-IM ya Naga nunger nisan atema masü, Naga nunger constitution atema masü, Naga nunger lungjemdaksütsü atema masü. Parnok ya Intangki reserve forest atema lir, Nagaland, Manipur aser Assam corridor amokbangtsü atema lir.

FNR-i len ania reconciliatory declarations aser pangzüng tem nungi atsüngzüka aoba ajanga kuli tem sayur. Naga nungeri tekeraba nung metsünga-reta agizüktettsü political solution aginer aser Naga nungeri jangraba ama takok angutsü asoshi sentong tejangja WC, NNPGs ajanga jembiogo, ta ashi.

GoI-i FA aser AP nungi "Common Draft" ka renemtar ta

ashir. Aser NSCN-IM-i NNPGs den külemi inyaktsü mesüra amentsü lendong timtem lir ta ashir. Parnok ya Naga nunger anema aser Naga solution raksatsüner. Naga solution ajanga par (NSCN-IM) miim sentong raksatsütsü jangja-jangja ajiteter. NSCN-IM ajanga Naga nunger aser GoI yoka achir.

FA yanglur temi yimtenren tsütsü aibelenba WC, NNPGs ajanga metongshitsütsüsa akumer. NNPG entities Naga nunger dangi oa Government of India nungi kechi aginer ta asüngdang, aser tangbo Indigenous Tribes in Nagaland, Indigenous Naga tribes in Manipur, Indigenous Naga tribes in Arunachal, Indigenous Nagas in Assam yimtenren tsütsü adianu kumogo aser Agreed Position junga meteta lir. Jembia aliba Status Paper ya Naga nunger aliba tesem ajunga nung Apex Naga tribal Hohos, village headmen, elected representatives, kaketshir tentet aser arogo lenirtem ket nung lir.

Akhi-alemli nungi Naga nunger li sür arudak tang state aser international boundaries aliba ya tesüiba indang aser 'contemporary political realities' nung shilem ka lir. Temulung agüja jembishinüba mapang item Naga nunger li ya tongtipang onük süa jembia arur. GoI asoshi Ibai Naga nübur ola asü nisung ishika indang ola-ar GoI-i meteta lir, ta WC, NNPGs sangdong ajangasa ashi.

Tuli jila BJP Unit team tasen tentettsü atema senden amen



Dimapur, Luroi/August 10 (TYO): Tuli jila BJP Unit team tasen tentettsü atema senden ka August 9 nü Longkongmendang Ward, Tuli nung senyur kidang menogo.

Iba senden ya tawa shiba unit tir Aotemsu Jamir-i ayongzüka menogo, kong team tasen tentettsü asoshi inyakyim, structural framework aser Town Unit tentettsü atema benoka aliba tarutsü nung mapa küma benoka aotsü asoshi sensaksema liasü.

Senden nung BJP 21 Tuli Vice President Sadem Yanger, party züngsem tejentem aser Tuli jila kübok colony aser ward balala nungi karyakarta temi shilem agia liasü.

Senden nung BJP Tuli Town Unit amenoktsü nüngdakba aser nükjidongtem sensak asem. Senden nungsa grassroots level nung party workers tem anioktsüba, taruba sentongtem, membership drive aser nüburtem den tongteptsü atema inyakyimtem, MLA & Advisor,

A Pangjung Jamir aser mandal tir Nuklutemjen Pongen na masetshi-i nongita yaritsü atema sensaksema liasü.

Senden nung shilem agirtemi Tuli jila nung BJP inyakyim akangshitsü bendanga agütsür aliba lemsatepba den unit tentetba inyakyim nung teka amteper inyaksü nangzüka liasü. Maneni parnoki Town Unit ya taruba senden nung formally tentettsü telemtetba agi, koba yakta agütsü renema lir.

Sikkim CM-i mapa minyaki aliba tanur tetsütem nem sen lemtsü

Gangtok, Luroi/August 10 (Agencies): Sikkim Chief Minister Prem Singh Tamang-i Deobarnü Aama Sashaktikaran Yojana kübok mapa minyaki aliba tetsütem parnok 32,000 nem sen 20,000 agütsüogo. Aama Sashaktikaran Yojana ya state indang scheme ka lir.

Rangpo nung sentong ka agiba mapang Chief Minister-i iba scheme kübok mapa minyaki aliba tanur tetsütem nem sen 40,000 agütsütsü nangzüker aliba nungi mezüngbuba

installment agüja liasü.

Iba sentong ya, "Aama Samman Diwas" sentong aser iba den repsema Tamang tepuokdak nungi chioker küm 8 ajungba anugomung amungba nung shilem ka liasü.

Tamang-i ashiba agi, iba anogo ya pa asoshi kanga dang tongtibang anogo ka lir, aser talisa tetsü Dhan Maya Tamang densema aliba ajanga tali tajungba kümdaktsür.

Facebook nung pa pelaba lemsatepa Chief Minister-i,

"kütsü küna dang temeim aser akümtsübu sayuba atema kanga pelar," ta ashi.

Ketdangsürtemi ashiba agi, parnoki iba scheme nung züngoksema maliba tanur tetsütem ajak züngoksemtsü atema tanem tanemi jenjang agütsü.

Rangpo nung sentong agiba mapangsa Chief Minister-i, Department of Women, Child, Senior Citizens and Divyanjan-i 'Nari Adalats' amenoktsü ta metetdaktsü.

First Rain & MITA, The Ant na senteper Mkg nung mezüngbuba “mental health camp” ayongzüker



MITA, the Ant den yaritepa First Rain-i 1st mental health camp ka Sangtemla Multipurpose Hall nung ayongzüka akaba mapang tangokba noksa nung angur. Mokokchung, 10th August, 2025

Mokokchung, 10 Aug (TYO): MITA, The Ant den yaritepa First Rain Foundation-i 'mezüngbuba mental health camp' ka Sangtemla Multipurpose Hall, Mokokchung nung August 9, 2025 nü ayongzüka kaogo. Iba camp ya tongtibangsa Mokokchung nung psychiatrist mali, anungji, nüburtem nem iba maongka lapoktsüba den nüburtem nem iba tsütsü angatetdakja

nungitdaktsütsü nükjidong yur ayongerba lir, ta tayongertemi metetdaktsü.

Iba camp nung nisung 21 arua treatment balala agia liasü. Camp nung tongti shilem agirtemji - psychiatrist ana, medical doctor ka, counsellor ka den volunteer parnok 12-i yaritep. Iba camp akatsü asoshi Sangtemla Ward yimdeni Sangtemla Multipurpose Hall angati tenlaba asoshi pelaba metetdaktsü.

Iba camp ya itashi tanabuba Honibar shia akatsü aser taruba camp-ji September 13, 2025 kasa tesem nung anepdang 9:00 ako nungi tenzüksü. Anepaluba/ reprangba taah aser mozü ita ka atema ajakji senteper senpak 500/- dang agir.

Iba camp nung dennür aser teyarinür kar danga lira, iba number - 8837365709 mesüra email firstrain924@gmail.com ajanga tayongertem tongtettsü.

Lokti nübu tsüka merekmejuba sentong agütsü

Dimapur, Luroi/August 10 (TYO): Taruba 79buba Independence Day anogomung atema renemshiba nung shilem ka ama Wokha Deputy Commissioner-i sangdong ka ajanga, August 13 nü anepdang 7 ako nungi tenzüka Wokha jila nung lokti nübu tsüka merekmejuba sentong ka agütsü ta metetdaktsüogo.

District nung Department tekolaktem aser Wokha nung aliba nüburtem dang iba merekmeju sentong nung

yakyaka shilem agütsü mepeshia metetdaktsüogo.

Maneni district tekolaktem dang iba merekmeju sentong indang noksa Wokha Government Servants WhatsApp Group nung lemsateptsü aser attendance record DC indang office nung benoktsü tetuyuba agütsüogo.

National anogomung ka mamung tsüngda jila mereka ayutsü aser lokti tensekdatep akangshitsütsü nükjidong nung iba sentong ya ayongzüko.

Kiphire nung Health & Wellness Camp ayongzüka agi



Dimapur, Luroi/August 10 (TYO): August 10 nü Assam Rifles-i ayongzüka Kiphire District nung tetsürtem atema Health & Wellness Camp ka ayongzüka agiogo. Iba camp ya tetsürtem nem healthcare service balala agütsütsü, tashidak nungi jenboa alitsü aser anema alitsü asoshi tangazükba balala agütsütsü nükjidong nung ayongzüka agiogo.

Camp mapang Assam Rifles nungi medical team-i angati temang tendangtsü, tetsür health, nutrition, hygiene, aser preventive care dak sendakba

nung tangazükba agütsü aser tenüngdakba mozütem lemja liasü.

Camp mapang tashidak tamajungba maküm tsüngda putettsüba, maternal health aser libaliro dak sendakba nung rangloker tetuyuba aser tangazükba agüja liasü.

Iba sentong nung arishi küm aser wadang balala nungi tetsürtem adenshia kanga jangrabangra shilem agiogo. Camp ajanga teküzmükba, anepaluba aser kati ka akümtsübutepba tanüla tali akangshitsüogo.

Manipur private hospital tem nung PMJAY service anentsü

Imphal, Luroi/August 10 (Agencies): State sorkari mapang talangka nungi tagütsütsü aliba sen magütsü tashi August 16, 2025 nü nungi tenzüka Pradhan Mantri Jan Arogya Yojana (PMJAY) kübok angati temang anepaluba sentong anentsü ta Manipur nung aliba private hospital temi sangdongogo.

Manipur Chapter of the Association of Healthcare Providers of India (AHPI) ajanga iba telemtetba ya July 30, 2025 nü senden amenba mapang agia liasü.

AHPI Manipur president Dr. Palin Khundongbam aser secretary Dr. James Elangbam nati sangdong ka agütsüba nung, senotsü tangutsüyim meyipa mangua ajanga private healthcare agütsürtem senotsü aser inyakyim nung timtem jenti ajurur, ta ashi.

"Senotsü tsütsü tanen makai tetsükdaktsü liaka private hospital temi state indang healthcare system nung maneni yaria aru. Ajisüaka mapang shidak nung senotsü mongui service agütsütsü tamakoktsü akumer," ta sangdong ajanga ashi.

Iba service anena ataba mapang private hospital temi akhi ama shidanger dang sen agütsü. Iba mapang PMJAY

beneficiaries nungi bendenba sen lira, sorkari tagütsütsü alibatam agütsüba sülen mozüki temi meyipa agütsütsü, ta AHPI ajanga jangjatsü.

Parnoki iba telemtetba agiba asoshi sasaba lemsatep aser nüburtem dang parnok timtem angatettsü ayongzüker aser ketdangsür dang tekeraba nung mera agütsü ajungshia liasü.

Iba sangdong ya ajanga temang anepaluba nung PMJAY dak metaloka alir, talisa teti dialysis agir shirangertem tebilemtsü akar.

Iba tebilemtsü nung temulung tali agütsüdaktsütsü mechi shiranger aser kinungertem Hokulbarnü Imphal nung aliba Manipur Press Club nung adenshia sorkar dang tekeraba nung mera agütsü ayongzüka liasü.

Anogoshi amai dialysis agirtem aser kinunger temi Manipur Governor aser health ketdangsürtem dang tekeraba nung tagütsütsü aliba sen agütsütsü mepishi aser sorkari senotsü magütsüba yong nisung takum lendongo yoktsü ta ashi.

Tang Manipur nung Ayushman Bharat - PMJAY scheme kübok mozüki 25 empanelled süa lir aser item rongnung sorkar mozüki 17 aser private mozüki ti lir.

PM Modi-i Bengaluru nung Vande Bharat Express 3 tenzüksü



August 10, 2025 nü Bengaluru nung Metro Phase 3 project atema lung azüngtsüba sentong Karnataka Deputy Chief Minister DK Shivakumar-i Ato kilonser, Narendra Modi nem sempet ka agütsü tangokba noksa nung angur. Kasa noksa nung Karnataka Angh Thawar Chand Gehlot aser Chief Minister Siddaramaiah nata angur.

New Delhi, Luroi/August 10 (Agencies):

Amongnü Bengaluru nung Ato kilonser Narendra Modi-i KSR Railway Station nung Vande Bharat Express asem tenzüksüogo.

Iba sentong tembangba sülen pai Vande Bharat Express train ka nung mener school tanurtem den jembia liasü.

Ato kilonser Modi-i tenzüksüba Vande Bharat train asemji ka Bengaluru nungi Belagavi tsüngda senzütsü, ka KSR Railway Station nungi Amritsar-Sri Mata Vaishno Devi Katra tashi aser ka Nagpur (Ajni)-Pune tashi senzütsü.

Item train tasen ajanga region balala nung yimtitem sendakteptsü aser ainlen senzüba mapang kanga ajema akümtsü.

Iba sentong nungji Karnataka Angh Thaawarchand Gehlot, chief minister Siddaramaiah, Union minister for railways Ashwini Vaishnaw aser Deputy Chief Minister DK Shivakumar nung densema tongti ketdangsertem aika liasü.

Modi Bengaluru tonga aoba mapang nung loktii "Modi, Modi" ta ayimdena pa agizük. Ato kilonserisa Bangalore metro indang Yellow line tenzüksüogo;

iba ya RV Road (Ragigudda) nungi Bommasandra tashi lir.

Metro Phase-2 project kübok iba ya sen crore 7,160 indoka yanglu aser iba lenmang ya kilometer 19 lir aser iba lenmang nung station 16 lir.

Ato kilonserisa Bangalore Metro Phase 3 project atema foundation lung azüngtsüogo. Iba project nung sen crore 15,610 indoktsü. Iba lenmang ya kilometer 44 asütsü aser station ajak senteper 31 alitsü.

Amongnü anepdang Modi Bengaluru tonga aoba mapang nung Karnataka chief minister Siddaramaiah-i pa agizüka liasü.

2019 küm Lok Sabha election nung ochimashi liasü: Congress

New Delhi, August 10 (Agencies):

Amongnü Congress general secretary, KC Venugopal-i, 2019 küm Lok Sabha voters' list nung ochimashi liasü; item ochimashi jungkai adoktsütsü atema party-i audit jungjunga agitsü, ta metetdaksü.

"Taoba Lok Sabha election nung voters list nung ochimashi aliba jungkai adoktsütsü atema audit jungjunga agitsü," ta pai metetdaksü.

Kerala kübok pa indang Lok Sabha constituency Alappuzha nung osangbenertem den jembidang Venugopal-i, "Tang opposition INDIA teloktep nung aliba party tem nungi

constituency 48 nung candidate temi vote 50,000 dak tali agi tamakok ngua liasü. Item menden ajak Congress-i jungjunga bushisüngdangtsü," ta metetdaksü.

Venugopal-i, "Ato kilonser Narendra Modi-i shidak takok ngua office mapa agizükba masü. Congress MP aser Lok Sabha nung opposition lenir Rahul Gandhi-i osangbenertem senden ka nung election ochimashi kuli agütsüba ajanga iba ya jungkai adokogo," ta ashi.

"J u n g j u n g a bushisüngdangba ajanga Modi-i anentsüsa akümtsü. Ajisüaka Election Commission (EC)-i Gandhi ang amokmerener.

Parnoki onok tsübudaktsütsü memerangtsüla," ta Venugopal-isa metetdaksü.

Brihostibarnü Rahul Gandhi-i, BJP aser Election Commission na senteper election nung ochimashi tulu inyaker, ta tai tonglokja liasü.

Ajisüaka Election Commission-ibo, Rahul Gandhi-i jembiba otemji tiyazü, anungji ibaji bushisüngdangtsü atema pai sangdong nung sign süa tenangzükba agitsüla, ta ashi.

Ajisüaka Rahul Gandhi-i, pai tenangzükba magitsü, kechiyong pai India linük temzüng kübok tenangzükba agiogo, ta ashi.

India-i America nung osettem nung saru atutsü tebilemba lir

New Delhi, August 10

(Agencies): United States-i India nung steel aser aluminium ama osettem nung saru aika atuba sülen India-ia America nung osettem nung saru atutsü tebilemba lir, ta telung osang ka ajanga metetdaksü.

India-i Russia nung dang nungi totzü alizükba aser Russia den tesendaktep tajung ayuba anema US Tir Donald Trump-i India nung osettsüset nung saru shilem 50 agitsü sangdongogo.

US-i mezüng India nung osettsüset nung saru shilem 25 atubaji August 7 nungi mapa küma benokogo aser US-i maneni ano saru shilem 25

tusembaji August 27 nungi mapa küma benoktsü.

India nung taoba mapang tatong Tir, M. Venkaiah Naidu-i, India-i item ama amokmeren nung malaotsüla, ta metetdaksü.

Taoba mapang US national security adviser John Bolton-ibo Trump Administration telemetba aija, iba ya aibelen tuluka lir, ta ashi.

Interview ka nung jembidang taoba mapang US ketdangser Bolton-i, "India anema saru tali atuba ajanga India-i Russia aser China den tesendaktep tajungba akümtsü, aser linük asemji senteper Washington anema inyaktsü," ta metetdaksü.



August 10, 2025 nü Singapore nung National Day anogomong nung Indian Naval Ship (INS) Sandhayak rong Changi Naval Base tonga aoba sülen tangokba noksa nung angur.

Nitish Kumar maneni CM inyaktsüsa masü: Prashant Kishor

New Delhi, August 10

(Agencies): Taküm November ita nung Bihar nung assembly election agitsü lia Amongnü Jan Surraaj party tongti, Prashant Kishor-i, Chief Minister Nitish Kumar joko shimang aser mental health kanga mejungi kümogo, ta metetdaksü.

Bihar kübok Nalanda nung roadshow nung osangbenertem den jembidang Kishor-i, "Nitish Kumar-i mapa tajung inyakba agi nüburtemi, talisa Nalanda-Harnaut nung alirtemi pa küm 20 tashi Chief Minister kümdaktsüogo. Ajisüaka tanübo Nitish Kumar shimang aser mental health ajanga pa maneni Chief Minister inyaktsüsa masü. Pa kanga tambur kümogo, anungji nüburtemi joko Nitish dak alia tangar dak rangloksüla," ta ashi.

Nithish Kumar Chief Minister inyakba mapang nung gari lenmangtem tajungba aküm aser nüburtem nem electricity agütsü, ajisüaka pai shisaliok aser mapa magütsütet aser bendangertem state telungi aitba manen, ta pai metetdaksü.

Tanga district tem dang nungibo Nalanda taliba renlokogo, ajisüaka yangi kanga sensak tia nung alirtem tebilemtsü mesamatsüet, ta pai metetdaksü.

"Tang tashi yangi aliba chirnurtem atema shisaliok aser mapa maongka magütsüteter," ta Prashant Kishor-isa metetdaksü.

August 3 nüa Kishor-i electoral roll tasenba nung tenüng aika agienba atema pai Election Commission aija liasü.

"Ajisüaka tang voters list nung alirtem kija-ia taruba assembly election nung BJP aser Chief Minister Nitish Kumar agentettsü," ta pai ashi.

RJD lenir Tejashwi Yadav-a aija Kishor-i, "Tejashwi Yadav-i jembitsüsa onük kecha mali. Election Commission-i tenüng aika agienadoker, ajisüaka tang voters list nung alirtem kijaia BJP aser Nitish Kumar agentettsü" ta metetdaksü.

"Bihar nung aliba nüburtemi tazüngla otem masü saka mapa aginer. Tiyazü tenangzükbatemji joko shingaia mamangtsü. Voter list nung malirtemi Election Commission den raratsü. Election Commission ya kibur masü saka nüburtem ang kiburtem lir. Nüburtemi shirnok nem vote agütsüdir parnoki akoktsü," ta paisa metetdaksü.

Congress MP Rahul Gandhi-a aija Kishor-i, Gandhi-i Delhi nung aliba Bihar nungertem atalatsür; state balala nung Bihar nungeri timtem ajurubaji pai mezüngshir, ta ashi.



Independence Day atongtsü anogo ishika dang lia August 10, 2025 nü Ahmedabad yimti nung 'Tiranga Yatra' agidang tangokba noksa nung angur.



TIR YIMYIM YIMOBILEM (EDITORIAL)

DIMAPUR MONDAY, AUGUST (LUROI) 11, 2025

Asenok külem sentong alitsüla

Asenoki aiben government dak aketba maparen asen terenlok mapatem inyaka aotsüba indang jembidang, asen kin longjemtsüla aser ano talisa Ao lima nungi adokba yimsüsür MLA 10 longjemtsüla ta jembir. Ajisüaka, asenoki asenok komaka longjemtsü aser parnok yimsüsürtema kong koma longjemtsüar mejangjatet tashi asenok longjemtsübaji pongmangsa asüyonga anüngdang pongmang asütsü. Aji oda, kechi inyaksüar memetet ser asenok longjemtsübaji masü saka mapa agi asenok longjemdaksütsüsa asenok arok ser mapa inyaksü sentong ka asenoki yanglutettsüla. Item arok ser inyaksüba mapa aser sentongtem dangji 'Külemi Yabosa Inyaksüba Sentong', Common Minimum Program, ta ajatsüa akok. Aji oda, Nagaland nung tanga district nungi adokba Aor MLA alitsüa akok saka itemji mezüngi Mokokchung district nungi adokba Aor MLA-tem asoshi iba Common Minimum Program nungjibo, ozü constituency aser nür constituency ta masü saka Mokokchung district rangben ajangzüksüsa nübortem asoshi kanga nüngdakba mapatem reprangdanga aser reprangteta enoktsüla. Tatishitsü agi, Aor MLA-tem Common Minimum Program nungji 2040 küm tashi nungbo Mokokchung town tashi train atua senzüa alitsüsa inyaksü. Tanabuba nung, 2040 tashi nungbo Mokokchung district nunga tayimtsü tulu arua anentettsüsa tayimtsü anendak yanglutsü. Tasembuba nung, Mokokchung district kübok aliba Community Health Center aser Primary Health Center ajak nung Medical Specialists aser surgeon-i anir inyaktertem ajak shitak alitsü. Pezübuba nung, Mokokchung district nung akaba Government Schools aser Colleges ajak nung tesayur aser kiojen shitak ayutsü. Trokbuba nung, Mokokchung district nung National Highway aser State Highways ajak shitak yanglutsü aser maintenance shitak alitsü. Tenetbuba nung, highway o highway na aser yimtsüng o yimtsüng na sentaktepba gari lenmangtem ajak shitak anepalua ayutsü. Tibuba nung, Mokokchung district nungi Hydro aser Solar Power perir anünga adokdaksütsü. Tukububa nung, Mokokchung district ajunga meketa Tourist Circuit yanglutsü. Terbuba nung Mokokchung District-i 2030 nungjibo ak, an aser aonsutsü tzümalen nungi bener matudaksüi asenoki metsütetba aser züsentetba agi asenok perir külenang tangaleni yoktsüsa aluyim sentong tenzüksü. Item ama külemi inyaksüba sentongtem ajanga mesüra, asenok longjemnüyonga asenok ajak 'political party' ka nung dang adentsüsabo melongjemtettsü. Ano, asenok putepa linüyonga, alima nung alir asünungji, lipoklisang aser sobaliba otsü nung mangatettep aser meputep ken o kenyongi mali ser putepa melitettsü. Ajisüaka, political party balala nungi asüyonga government nung alirtem o malirtem naji pei lima aser nübortem ajangzüksü asoshi inyaksüba sentong aser mapa agibo longjemdaksütettsü. Kasaji, sobaliba ken o aika agi asenok meputepteti liaka asen lima asoshi inyaksüba sentong aser mapa agibo asenok zep ta longjemtettsü. Aji oda, mapang mapang shia asen lima nung, talisa Imkongliba Memorial District Hospital aser Mokokchung TB Hospital ama nungi Specialist doctor-tem bener oa adoker aser temelenbo magütsür ta asüba mapang lokti tentettemi tejashi aser taginüba ola adokba angashir aser aiben government-i nübortem temulung süa meinyaksü. Ashi, tanü asenok rongnung yangi lemsatepba ama, MLA 10 temulung ka ser inyaksüba "Common Minimum Program" ka ali nungbo, tang amaji tangari asen nüngdak mezüngshii pei inyaknütsü meinyaksü. Aiben asenoki nübortem asoshi "Development" mapa inyaksüba ya tangar constituency nung aliba ka asen constituency-i belena bener aruba dang ajar amai bilema inyaker, ajisüaka ajibo development masü 'destruction' lir. Iba amaji, asenok longjemer asen lima renloktsü asoshi Arok ser Külemi Inyaksüba Sentong, Common Minimum Program, maliba ajanga, medemer kümer külemi inyaksüba agi tsükchir ama kümer nia ni atema aser naa na atema ta inyakdang, tangar tsüngdang asenoksasa asenok akhüm maket kümadoker aser ka khen, ka khen ta mezüngmeshidaktsür.

OLEMSABANG

OSHI RAKSABA KULI

~ P.Renthy Jamir.

(Yashi adok nungi...)

Matamabensa:-Osang zülur Radio osang azünger ajaki ibai tai zülur, tai azünger. Ao oshi nung iba ya O tamajungtiba ka lir matamabensa shisatsü teje ka mait matu, somatangma, lembumazük ya physical indang jembiba masü idiot weakness of mind foolish stupid. Lemtamata süra tenük telen mabensa telemta disabled invalid physically unfit ana ya khenyongi taiteptsü mali.

Purapitet:-Iba ojang ya tanü asüng tawa tanü ka nungi lanurtemi bulua jembiba ojang tasen ka lir. Aser ya kongnungi poktet shingaia meshiteter ya tetezü makaba ojang ka lir. Iba ocet nung kechiba iba ojang anaben amshir tasüra khen Arok osep nung raksaba aser tang osang zülur azüngertemi raksaba ya mezüng rasa-a shiogo iba melena bushitet shisatet asatet ta jembir. Alimai anü meküta alonger to scientist temi bushitet. Telephone ya scientisttemi shisatetba asatetba oset ka lir. Shisadanger asadanger ochi kuli agütsü tenla ki tobur tajung sütetba ya lanubai asatetba shisateba lenden metong shitak asadanga shisa danger yangluba. Azü O ak na lumungi aoba otsü ya Alokbai puraba lir. Koya molu yima tsüjong abeni aiba otsu ya nisungi yazü puratetba lir. Pura puratet ochi masü tiazü tamamangtsü.

Amungnü:-Asen Ao oshi raksaba rongnung iba ojang ya-a ka lir joko meyipa bener marutettsüba teraksa ya tamalen ashishiteper meyanglushitetba Aori kodanga deobar(Sunday) anogo dang amungnü ta ja-a maru saka yashi tashi barmung ta ja-a aru asen lima khristan yimsü arur küm 153 dang lir saka barmung yabo akhi dang nungi ja-a aru. Ano khristan yimsü arura tenla kidang tanü temeshi amungnü ta jembiba dak alema ya mejembi. Aor koridang alidang nungi tzümar den shishitepa aru. Maibang tzümar ta, maibang nok ta, maibang mersü ta jembir asenoki kümpa liangmesen batiao süngmok bener alu metsü melena bener atu. Ao lima nung metsü maka aser aji machi maremer. Idangnungjagi yashi tashi pei pei rongbang nung Deobar Bazar anogo nung lua shishiba anogo dang Barmung ta ja aru. Aor amongtsümong aika lir saka mejeta amungnü ta ja-a maru. Tanü lanurtemi yamala oshi aika raksar literal meaning tetezü tejangja makaba agi melena jembir, tatishitsü ka ninok mo tedong anir arua rangzükba nok saka linok linok ta jembiba ama, yamaji tang tashi amungnü süirbo ozü lui odinie? ta masü bar mungerbo ozului odi nie? ta jembir.

Yamala tetezü tejangja tanü temeshi amungnü ta jembiba dak alema ya mejembi. Aor koridang alidang nungi tzümar den shishitepa aru. Maibang tzümar ta, maibang nok ta, maibang mersü ta jembir asenoki kümpa liangmesen batiao süngmok bener alu metsü melena bener atu. Ao lima nung metsü maka aser aji

machi maremer. Idangnungjagi yashi tashi pei pei rongbang nung Deobar Bazar anogo nung lua shishiba anogo dang Barmung ta ja aru. Aor amongtsümong aika lir saka mejeta amungnü ta ja-a maru. Tanü lanurtemi yamala oshi aika raksar literal meaning tetezü tejangja makaba agi melena jembir, tatishitsü ka ninok mo tedong anir arua rangzükba nok saka linok linok ta jembiba ama, yamaji tang tashi amungnü süirbo ozü lui odinie? ta masü bar mungerbo ozului odi nie? ta jembir.

Yamala tetezü tejangja akaba ojang aika raksar entokogo aji meyipa bener marutettsü. Kechiyong oshi raksababo oset ka raksaba ama masü. Anungji Ao oshi tesamar, tesamar ta jembia mekazüi shirnoksa Ao oshi literature mapa inyaker onoki inyakba ya-ang shitak tangari melenshitsüba kecha magizüksü ta masütsüla Ao osang kaket zülurtemi tapi agi tetezü mejangjai mezulutsüla. Radio Ao osang azünger Ao oshi meteter nem dang züngdaksütsü. Süra Ao oshi tang ama yabo meraksatsü ta bilemba shisa lemsateper.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Tan ita tatembanglen Belfast nung 'March for Jesus' sentong agitsü



Yaküm Dublin nung 'March for Jesus' sentong agidang tangokba noksa nung angur.

August 10, 2025: Tan ita tatembanglen Belfast nung aliba Ormeau Park nung 'March for Jesus' sentong ayongzüka agitsü.

Belfast City Hall nung senden aliba mapang nung Belfast City Council committee-i iba sentong agitsü atema temelaba agütsüogo.

All Nation Church-i August 23, 2025 nü Ormeau Park nung 'March for Jesus' sentong agitsü atema council dang mepishia liasü. Iba sentong nungji nisung 10,000-i shilem agitsü imlar.

Council document nung Arogo aaddress ji National Boxing Stadium, South Circular Road, Dublin 8 lir.

Iba rally ya mezüngbo Honibarnü, June 7 nü agitsü sentong liasü, aser Custom House Square nungi Belfast City Hall tashi agitsü

tebilemba liasü. Ajisüaka sentong ayongzükertemi ano anogo atsülanga sentong yanglushiogo.

Taoba hopta council report ka ajanga, "All Nation Church-i iba sentong agitsü atema Ormeau Park amshitsü asüngdanga liasü aser iba rally ji city hall tashi oa agiba sülen iba tesem nungjisa sentong tembangtsü," ta metetdaksü.

'March for Jesus' ya yimtenren den sendaktepa aliba sentong ka masü saka kibongtemi amongba Khristan tamang benjung ka lir.

Iba sentong ajanga Ireland nung aliba Arogotem longjemdakja tekülem sentong agitsü, yimjung atema sarasademtsü aser teimla osang sangdongtsü.

All Nation Church-isa kasa sentong ka Dublin nung

ayongzüka liasü aser iba sentong nungji nisung 20,000 dak tali aden.

March for Jesus rally ya nikongdang Ormeau Park nungi tenzüksü; parnoki Ormeau embankment aser Ravenhill Road süia jajatsü aser Belfast City hall nung iba sentong tembangtsü.

"Iba sentong nung nisung 5,000 nungi 10,000-i shilem agitsü, ajisüaka nisung kwi adenshidir iba osangji All Nation Church-i Ireland nung aliba Arogotem den külemi asadangba sülen ang tejangja metetdaksütsü," ta sentong ayongzükertemi metedaksü.

"All Nation Church-i Ormeau Park nungi city hall tashi agitsü aliba sentong nung yariteptsü atema Worshipful Brother Paul R McMichael dang asüngdangogo," ta parnokisa metetdaksü.

ANOGO ABEN TSÜNGREM DEN

Ne Taküm Samaba

Kechiaser shibai pei taküm soitnüdir aji samatsü aser shibai ni atema pei taküm samadir aji angutsü. Mathi 16:25.

Khristantem dang pei taküm samatsü ozüng agütsü. Ibai teti parnoki peisasa parnok taküm Tsüngrem aser Pa yimli asoshi agütsütsüla. Tsüngremi tenyaba mapa na asoshi tetsükdaksü tulutiba kaji, na akaba nung ne temeten- ni kechi bena aru iba nung kü mulung kaa jangratema alitsü ni temeten kar ta bilembaji lir. Item osettemji Khrista nem agütsütsüji tasak masü aser tenla masü, nai lemanng mashi ka nungi aji inyaksü akok. Tejangjabaji ibai, koba tajung aser nai meimer ibaji na aser Tsüngremi mulungba tetsüngda nung noktaksü akok.

Tatishitsü agi, ner tanur aser semchir anasa alibaji junger, Tsüngremi tenyaba mapa inyaksü asoshi Pai na yimti kati mesüra alinük tanga kati Pa den aotsü mulunger. Anisüngzük teperi agitsüji junger saka aonung tiprong nung na ajatsü akok. Oset kar nungbo na temeten kar ta nai bilemstsü akok, saka Tsüngremi na akaba ajak Pa aser Pa nükjidong asoshi agüjang ta asüngdangtsü akok (Matt. 19:21).

Taküm tsütsü Yisui iba inyakyim abensaa sayu. Kotaker tesünep nung pelaa alitsü Pa temeten liasü. Aji saka idakji Pa temeten lir ta pai mesot, mesüra item ajak toktsübaji Pa tenla ta Pai meblem (Fil. 2:5-11). Iba yongji Tsüngremi Pa kanga ulutsü aser teraksa lima ka dangi tekümtet bener aru.

Alimai nai agitsü kar nungbo temeten kar ta ajungshia lir asü? Nai ne taküm kümzüktsü meranger asü? Yamaji inyakdang Tsüngremi ne nem kadaktsünüba taküm samadar ta nai metetter ma ?

Tasen Lai mezüng menüngba sülen küm 500 ajungba amonger

August 10, 2025: English oshi nung Tasen Laishiba menüngba sülen küm 500 abensaba nüngtem nung Antwerp nung Quincentenary among tenzükogo.

John Wycliffe aser pa den külemi inyaktertemi 1300s tatembanglen Latin oshi nungi English oshi agi Lashiba menüngzüka liasü. Ibaji ajanga England nung mezüngbuba evangelical movement 'Lollards' tenzüka liasü.

Iba movement nungjagi nisung ka tenüng agi William Tyndale-i Greek oshi nungi English oshi agi Tasen Lai mezüng menüngzüka liasü.

Pai 1525 küm Tasen Lai meyipzükbä maparen renema sülen taküm küm 500 ajunger. Laishiba meyiptsü atema English Church ketdangsertemi pa nem temelaba magütsü, anungji pai iba maparen renema inyaksü atema England nungi jena aotsüsa aküm.

Pa Germany-i jena aoba sülen 1525 küm Cologne nung Tasen Lai meyipzükbä maparen renema liasü. Ajisüaka tia maka pa ashioxtsü

aser pai meyipzükbä Tasen Lai nungjagi Mathi kakat nung mezüngbuba tapu 22 dang rizünga yutet.

Tesülen pa Worms-i ao aser maneni asentenshir pai meyipzükbä Tasen Laiji England aser Scotland nung 1525 küm tatembanglen record süa liasü.

Pai Tasen Laiji revise süshir Antwerp, Belgium nung tanaben adoka liasü. Ajioda English oshi nung Tasen Lai mezüng menüngba sülen küm 500 ajungba Quincentenary ji 2025 aser 2026 küm piyong amongtsü.

Tasen Laishiba mezüng adoksangji William Tyndale lir, pa mapa ajanga tesülen tangartemi King James Version aser RSV, NRSV aser ESV ama versions adok.

Pa nüngtem nung research agitsü aser scholarships agütsütsü atema 1995 küm The Tyndale Society tenteta liasü. July 8-11, 2025 anogotem nungi Tyndale Society-i Tasen Lai mezüng menüngba sülen küm 500 ajungba Quincentenary tenzüka Antwerp nung

Conference ka agiogo. University of Antwerp, Plantin-Moretus Print Museum aser Louvain University-i longiemer iba conference ayongzüka liasü.

Iba conference omenji "Tudor England and the Antwerp Book Trade" liasü. Iba conference nung nisung noklang ka jungnüai William Tyndale indang study süa pa indang taküm otsü aser pa mapatem lemsatet. Iba dak alia taküm ya The Tyndale Society tentetba sülen küm 13 ajungba amonger.

Antwerp ya English Laishiba den kanga sendaktepa aliba yimti ka lir, kechiyong William Tyndale aser Myles Coverdale napronglai iba yimti nung Laishiba meyipba mapa tenzüka liasü aser tenati inyakba mapatem aika iba yimti nung aliba press nung menüng.

English Laishiba meyipzükbä sülen küm 500 ajungba nüngtem nung Tyndale Singers-i kenten sentong ka ayongzükjä kaogo. Iba telok nung züngsemtemji taoba mapang English Choral Society nung züngsemtem aser tang

aliba züngsemtem densema lir. Parnoki Tyndale taküm aliba mapang tenshiba kentem aika aten.

Antwerp nung ayongzükbä sentong nungji Aso 16buba mapang aliba kakat tejen aika saya; item kakat rongnung 1526 küm Tasen Lai densema lir. Iba Laishiba ya Stuttgart nung aliba Landesbibliothek nung ayur, ajisüaka Antwerp nung aliba Plantin-Moretus Museum-i khenpiga atema meshizüka lir.

Exhibition nung sayabatem rongnung William Tyndale-i Vilvoorde nung aliba jail nungi züluba shidi ka densema lir. Ano 1526 küm Tasen Lai ka British Library nung lir, ajisüaka iba Laishiba 'cover' bo samaogo.

Alima tesem balala nung Arogotem aser telok aikati English Laishiba meyipzükbä sülen küm 500 ajungba nüngtem nung sentong balala ayongzüka amongtsü.

Osang tejangja metetnertemi Tyndale Society den parnok indang website ajanga tongteprateptsü akok.

Indonesia nung Tenla ki asüba project ka nokdang

August 10, 2025: Indonesia linük nung Kederi yimti kübok Moajoroto nung GKJW Arogoi Tenla ki ka tesüdak mapang nung ketdangsertemi nokdangogo, ta International Christian Concern (ICC)-i metetdaksü.

Arogo jagi Tenla ki tasen asütsü atema kiyong nung alir 65 dang nungi temelaba ngua liasü, aser ibaji telatetba dang nungia teimba lir.

Tawa SETARA Institute-i, Indonesia nung yimti tajungtiba aser taremzüktep aliba yimti tajungtiba rongnung Kediri densema lir ta sangdonga liasü.

Tenla ki asütsü atema Arogoi 1995 küm ali ngua liasü. Arogoi 1997 küm nungi taküm tashi iba kimong ya Moajoroto Community Development Center (TPM) nem 'rent' agüja liasü.

Yaküm May ita nung Arogoi church construction committee tentet aser Tenla ki asütsü atema-a temelaba ngua liasü. Ajisüaka July 27, 2025 nü ketdangsertemi iba Tenla ki asüba project nokdang, ta Rev. Puput Yuniatmoko-i metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Tesep**

(n) ozü sangnu aser shiruru ki (nest)

* Ozüi tesep süngdong nung yanglur.

Teseplep

(adj) mashimashi inyakba, shi azü mazüok senzüba (Indecent, immoral)

Ni kanga teseplep nisung liasü

OLONG PAITEP # 7236

1			2			3			4	
			5		6		7			
8										
			9							
	10									
								11	12	
			13				14			
15						16				

TIPLIN

1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T ___ lu - (3)
10. Takdang temalen - (9)
11. Tesa ___ a - (3)
13. Ajungbena temulungjang
tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

1. Reprangdaksü - (4)
2. ___ ur - (3)
4. Kiojen yangludak - (6)
6. ___ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemtdak - (6)
12. ___ adenshi - (4)
14. Tsünüsönbongtsü adokdak - (3)

OLONG PAITEP # 7235 TELANGZÜBA**TIPLIN :**

1. Kasa, 6. Rangben, 7. Mait,
9. Poktet, 11. Ati, 13. Atasa,
16. Rür, 17. Rajang, 20. Lanu,
24. Nüngjem, 25. Süra.

LANGTSÜNGLEN :

1. Khu, 2. Sükaj, 3. Onük, 4. Oba,
5. Anü, 6. Ratet, 7. Mozü, 8. Ita,
10. Tar, 12. Tinu, 14. Salem,
15. Aja, 18. Anünü, 19. Taju, 21. Ano,
22. Onü, 23. Kua.

NAI-A YA METETTER MA**TETSÜR BALLON D'OR NOMINEE TEM**

2025 Women's Ballon d'Or

NOMINEES

Sandy Baltimore

Barbra Banda

Aitana Bonmati

Lucy Bronze

Klara Bühl

Mariona Caldentey

Sofia Cantore

Steph Catley

Temwa Chawinga

Melchie Dumornay

Emily Fox

Cristiana Girelli

Esther Gonzalez

Caroline Graham Hansen

Hannah Hampton

Pernille Harder

Patri Guijarro

Amanda Gutierrez

Lindsey Heaps

Chloe Kelly

Frida Leonhardsen-Maanum

Marta

Clara Mateo

Ewa Pajor

Claudia Pina

Alexia Putellas

Alessia Russo

Johanna Rytting Kaneryd

Caroline Weir

Leah Williamson

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Meghalaya nung police constable ka densema Bangladeshi nunger 4 apu

Shillong, Luroi/August 10 (Agencies): Meghalaya police aser Border Security Force (BSF) na longjemer meita aoba mapang police constable ka densema Bangladeshi nunger pezü puogo. Parnok ya South West Khasi Hills nung asangur chanu ka pur oa züka merenshiba atema pua liasü.

Item nisungtem ya ozüing alema inyaksangshiba telok ka nung densema alitsü ta temulung melemer aser parnok ya Honibarnü pua liasü.

South West Khasi Hills Superintendent of Police (SP) Banraplang Jyrwa-i ashiba agi, August 8 nü anepdang 1 ako meta nisung 8-9 ka Rongdangai yimtsüng nung dokan kati ai.

Dokan nung Balsrang A. Marak (21) mejanga liasü. Item nisungtem yagi pistol aser tanga hadirtem bena liasü, aser parnok Marak tekolak nung pistol teneter dokan kibur indang phone number meshi.

Jyrwa-i ashiba agi, item nisungtem yagi asanguba ya alen aser New Rongdangai yimtsüngleni anir ao, kong parnok pa tepseta intoktsü sentong yanglua liasü. Ajisiaka Marak-i pa towel ka agi alener aliba salateta ajen aser anasa

aliba ki kati tua ki shibanga liasü.

Item nisungtem yagi pa arishi aser kishi nung injang khaloktsü aser ki kakkoker telungi ai. Parnoki Marak dak azük aser ki kibur dang pa temang anepalutsü atema anir aotsü tetuyuba agüja liasü.

Khonjoy yimtsüng nung prangbongbener nisung telok ka ki kati aiba osang police-i Hokolbarnü 2:15 ako shi nung angazüka liasü. Nonghyllam Police Station nungi ketdangsürtem iba tesem tonga aoba mapang item nisungtem ya aremi jena ao. Police-i kümdangshitsü atema injang ana khaloktsü saka item nisungtem ya maneni jena oatok.

Iba sülen police-i bushisüngdanga aoba mapangm bu ka, screwdriver ka, sen, wireless radio ka, mobile phone, aser Marufur Rahman meyong Bangladesh Police constable ID card ka densema oset balala toktsür or aliba nguteta liasü.

Honibar anepdang Khonjoy yimtsüng nung alirtemi item nisungtem rongnung ka apu aser police nem bendanga agütsü. Iba sülen South West Khasi Hills Police, BSF aser yimdaklirtemi iba tesem temeket meita ao tenzüik aser iba telok

nung ano nisung asem arem nung pua liasü.

Sepaitemi pua aliba Bangladesh nungertem ya Jahangir Alom (25), Saen Hussain (30), Mefus Rahman (35), aser Bangladeshi police constable Marufur Rahman (32) ta jangjaogo.

Yimdaklirtemi pua azükba sülen Marufur Rahman yiru aser pa Ranikor CHC-i temang anepalutsü anir ao. Tanungba nisung asem ya-a terara yirua liasü.

Kasa mapang nung Marufur Rahman-i, Bangladesh Police ID BP911139470 ya pa indang ta nangzükogo. Pa ya shitakba police ka asü masü aji jangjatsü atema inyakdar.

Maneni pua alirtem dang ken o ashishiba sülen iba ozüing alema inyaksangshiba telok nung ano tanga Bangladesh police-a densema ali mali aji jangjatsü.

ken o nung akoksasang Balsrang A. Marak ya kanga mejungi yiru aser pa Shillong Civil Hospital-i anir aotsü tetuyuba agüja liasü. Pa temang tang tajungba lir.

Maneni iba telok nungi tanga züngsemtem aputsü atema police-i Khonjoy temeket meita ao tenzüikogo.

Guwahati police-i tetsür chanu ka kümzükogo

Guwahati, Luroi/August 10 (Agencies): Honibarnü tetsür chanu ka samaba indang tetsüi tashishiba ka benokba sülen Basistha Police Station nungi East Guwahati Police District (EGPD) team-i iba tetsür chanula ya kümzükogo liasü.

Police-i ashiba agi, tetsür chanula ya Guwahati kübok tesem ka nungi sama. Tashishiba agizükba sülen police-i yakta dang iba tetsür chanula bushi tenzüik aser bushia aoba mapang Hatigaon nung ki ka tonga oa liasü.

"Tanur samaba ken o ya kanga süoki ia agir. Osang angashili tetsür chanula ya kong ali aji jangjateta la kümzüktsü asoshi ozü team inyak tenzüka liasü," ta iba meita aoba sentong nung densema aliba EGPD ketdangsür kati ashi.

Tetsür chanula ya kümzükba sülen ketdangsürtemi temzüng ozüing kübok tinyaktsü maparen ajak tembanga inyakba sülen la tetsü den longjemdaksüogo. "La dak kecha timtem lendong



matalokdaksütsü atema rangloker inyaka liasü. La tekümzükba kübok kidangi meyipa yoktetba atema onok pelar," ta ketdangsür yagisa shisem.

Iba police team yagi takaratiba nung jenjang tapet agiba atema parnok nem tenüngsang agüja Guwahati Police Commissionerate-i iba osang ya social media ajanga lemsatop aser Chief Minister Himanta Biswa Sarma aser Assam Police DGP tag süja liasü.

Child rights advocates temia iba meita aoba sentong takok ngua benokba atema tenüngsang agütsüogo aser tanür kümzükba toktsütsüba dak sendakba nung nüburtem nem tangazükba agütsütsü koda tongtibang iba indang lemsatopa liasü.

Protection of Children from Sexual Offences (POCSO) Act kübok, tanur mezüngmeshia amshiba, pur aoba amala ya kanga süoki ia agir, aser temzüng ozüing dak ajemdaker sashi sashia merenshir.

Assam nung tetsür telok kati arms license policy anema nokdak

Guwahati, Luroi/August 10 (Agencies): Assam sorkari lendong agi meneptsü ana nung aliba tesemtem nung aliba lisopurtem nem prangbong license agütsütsü atema telemtetba agiba süoki ia bilemba Assam nung tetsür telok kati lemsatopogo.

Iba telok dang ya Nari Nagarik Manch ta ajar, koba apolitical platform ka lir. Parnoki ashiba agi, iba policy ajanga azütokshi lendong taliba küm daksütsü aser yimjung asoshi küm aika inyaka aruba amajok küm daksütsü aser state yongtsü nung mepetmesü

adokdaksütsü.

Parnokisa, nüburtem nem prangbong injang agütsütsü melena security dak sendakba ken o tem bentettsü asoshi law enforcement agency tem akangshitsü atema tali rangloker inyaksüla, ta ashi

Guwahati nung senden ka amenba mapang iba telok yagi ashiba agi, sorkari iba telemtetba agiba ajanga atsüapong dak ajemdaker mepetmesü aser lendong aketba prangbong amshiba sobaliba ka tentetdaksütsü ako.

Iba telok yagi iba telemtetba ya agintsü khanga India Tir, Ato

Kilonser, Angh aser Chief Minister dangi tezüluba nung takhangba agütsütsü telemtetba agiogo.

Parnokisa, iba policy anema Public Interest Litigation (PIL) ka benoktsü aser social media campaign ka tenzüiktsü telemtetba agiogo.

Assam Cabinet-i, Dhubri, Morigaon, Barpeta, Nagaon, aser South Salmara-Mankachar district tem aser Rupahi, Dhing, aser Jania amala tesemtem nung lisopurtem nem arms licenses agütsütsü atema telemtetba agiba May 28 nü agizüka liasü.

Trump-i anosa India-Pakistan ceasefire tenüng agir



Washington, Luroi/August 10 (Agencies): May ita India-Pakistan rara nung nuclear nok-nü amshitsü aliba nungi nokdangtsü mechi tetsüngtai ai, ta US Tir Donald Trump-i anosa ashi aser linük ana tsüngta pai angatettepdaktsüba nenshia ashir. White House nung Azerbaijan aser Armenia tirttem tsüngta yimjung tezüngzüktep agiba sentong ka nung jembidang, iba rara nung tayimtsü pongu mesüra trok khazüka yok, ta Trump-i ashi. Yimjung tezüngzüktep nung meyongnem agütsüba sülen

Armenia aser Azerbaijan lenirtemi iba otsüsütsü agreement mechi Donald Trump ya Nobel Peace Prize asoshi nominate asütsü ta ashi. Armenia aser Azerbaijan lenirtem aliba sentong nung jembidang, "India aser Pakistan den asenoki takok anguba sülen tanü iba yimjung tezüngzüktep ya züluteper. Parnok kanga sashia rara liasü. Rara tesashi, nenoki meteta alitsü, nuclear rara metenzükdang linük ana lenirtem lungjem," ta Trump-i ashi. India aser Pakistan tsüngta

pai yimjung yanglutsü ta tenüng agiba ya ibai mezüngbuba masü. Pai iba ama sangdong ya May 10 nungi agüja arur, kodang linük ana tsüngta tsükchitepba ajema akum. Trump-i yimjung yanglutsü ta jembiba India ketdangsür temi magizüker. Honibarnü Air Chief Marshal AP Singh-ia ceasefire alitsü telemtetba ya India kisüingi mulungtetba lir aser dangari tetsüngtai aita inyaktsüba masü ta ashi. Bengaluru nung sentong ka nung jembidang, iba rara ya "high-tech war" ka liasü aser ghonda 80 nungi 90 tsüngta Pakistan mitkar indang osettsüset aser ki o jen aika raksatsüba yong tsükchiri rara anentsü bushitsüsa akum, ta Air Chief-i ashi. "Parnok tejakleni aru aser jembishinü kaner ta asen DGMO dangi osang ka yok," ta pai ashi, anungji Pakistan mitkar lenirtemi mezüng mera agiba ajanga ceasefire ya yanglutet ta jangjar. Indian Air Force ajanga Pakistan indang fighter jets pongu aser tayimtsü tuluka khazüka yok, aser airbases aser command centres tongtipang kar raksatsü, ta AP Singh-i ashi. Mapang tatsüka tsüngta mitkar nükjidong tongtetba ajanga Pakistan ali nung apudak, anungji rara ya dangari ajungshiba agi masü saka India-i par sasa anen ta sayur.

ChinaForeignMinisterWangYi-iPakistansemdangtsü

Beijing, Luroi/August 10 (Agencies): Küm shia aliba Pakistan-China Strategic Dialogue senden nung adentsü asoshi ita tatemlen China Foreign Minister Wang Yi-i anogo ana asoshi Pakistan semdangtsü, koba flagship projects tem terenlok reprangshitsü aser rongsenketzüng, defence aser security tsütsü linük ana tsüngta tesendaktep akangshitsü nükjidong nung tenzüka tongtipang diplomatic forum ka lir. Senden ya August 20-21 anogotem Islamabad nung amentsü lir. Pakistan nung alidang Wang Yi-i Tir Asif Ali Zardari, Ato Kilonser Shehbaz Sharif aser Chief of Army Staff Field Marshal Asim Munir nunger den senden balala amentsü. Item senden nung China-Pakistan Economic Corridor (CPEC), joint security cooperation mechanisms, strategic depth assessments, region tashi ita alitsüba aser defence exchanges programmes tem ulushitsü indanga jembitsü, ta Pakistan foreign ministry nungi osang kar ajanga ashir. Tawa Pakistan-India tsüngta tensa tamajungba akumba sülen ibai Wang Yi asoshi tang mezüngbuba Pakistan semdangter alitsü. Ita ishika tsüngta Pakistan aser Washington tsüngta tesendaktep tajungba akumba indanga jembitsü akok, ta

ashir. Islamabad ya United States den tesendaktep tajungba kumaka Beijing-i Pakistan nung yimtenren aser rongsenketzüng tsütsü tsüngnep tajung aginer. Islamabad nung item senden amenba sülen linük anaprong nungi ketdangsürtem dener Kabul semdanga Afghanistan lenirtem den sensaksem akatsü sentong lir ta iba sentong meteta aliba ketdangsür temi ashi. Iba mapang rongsenketzüng tesendaktep adoktsü aser cross-border security nung tesendaktep akangshitsü asoshi jembitsü. Wang Yi-i semdangba ya linük ana tsüngta temaba ketdangsürtem ajuruteptsüba sentong tulu nung shilem ka ama ajiteter. Iba sülen Pakistan Ato Kilonser Shehbaz Sharif-i August 29 mesüra 30 nung China-i aotsü aser Shanghai Cooperation Organisation (SCO) summit nung adentsü. Beijing nung pai China Tir Xi Jinping aser Ato Kilonser Li Qiang ajurua trade, investment, infrastructure development aser regional integration inyakyim indang jembitsü. Islamabad nung jembishinüba ya Central Asia nung tesendaktep maongka tuluba akumba nung linük anaprong tasa yanglushitsü, Afghan tensa aser CPEC investments wazüka ayutsü asoshi sapang ka ama asütsü.

Trump-i Alaska senden nung Zelenskyy jaoktsü asadangtar

Washington, Luroi/August 10 (Agencies): Alaska nung August 15, 2025 nü Russia Tir Vladimir Putin den US Tir Donald Trump ajurutepe senden amentsü aliba nung Ukraine Tir Volodymyr Zelenskyy jaoktsü White House-i asadangtar, ta osang kar ajanga ashir. US ketdangsür ka aser telung nung iba sentong jembiba meteta alir nisung aseme iba sentong lemsatep, ta osang ajanga ashir. "Iba indang jembitepba mapang lir," ta osang ka ajanga ashi. Zelenskyy adentsüba ano tetem kuma melemtet aser Ukraine tir ya senden balala nung adentsü asoshi Alaska-i arutsü asü masüar mejangja lir ta ashir. Tir Donald Trump-i Alaska nung Russia Tir Vladimir Putin aser Ukraine Tir Volodymyr Zelenskyy den külemi senden amentsü mulunga lir, ta White House ketdangsür kati Honibarnü ashi. Ajisüaka tangbo Putin-i aginüba ama White House-i linük ana lenir senden amentsü

atema ang sentong yanglutar, ta ketdangasüri ashi. Kasa mapang Ukraine tembar European linüktemia Russia den yimjung ken o jembiba nung Kyiv adentsüla ta ashir. Alaska nung Trump aser Putin senden amentsü lia UK, France, Italy, Germany, Poland, Finland aser European Commission lenirtem külemi sangdong ka agüja liasü. Zelenskyy-ia Kyiv medeni tezüngzüktep agiba ajunga "telemtetba tasü" den sako asütsü ta shia lir. Taoba mapang Trump-i Putin den kisüing ajurutepe tenzüksü sentong lir ta osangbener dang shia liasü. Iba sentong ya Putin-i mulungtsü asü masüar mejangja - aser taoba mapanga indang-indanga Ukraine lenir den jembitsü maongka aika ngur sernung pai magi aser küm asem tejakdang Putin-i tashi ajak amshia Ukraine amak tenzüker lenir ana ya ajurutepe mali. Hokulbarnü jembidang, Moscow aser Kyiv tsüngta agreement ka yanglutsü asoshi

litsü-lika melenteptsü Trump-i shisem, koba Zelenskyy-i khenyongi memulunger. "Russia-i mapa tamajung inyakba atema par nem onoki sempet magütsütsü. Onok anema telemtetba kar danga agira, Ukraine medeni telemtetba kar danga agira, aji yimjung anema telemtetba agir asütsü," ta Zelenskyy-i Telegram nung ashi. "Russia nungeri tang tashi Ukraine nunger litsü-lika melen Ukraine nunger litsü-lika melenteptsü tasa lir, koba ajanga temulunglemtsü kecha magütsür saka Russia nungeri maneni raratsü atema jenjang tajungba ang agütsür," ta pai temulung meranga ashi. Russia nem Ukraine anüdoklen Donbas region ajunga agütsütsü aser Crimean Peninsula par kübok yudaktsütsü asoshi agreement agizüksü asoshi White House-i European allies tem ajungshir, ta osang ka ajanga ashir. Ajisüaka European lenirtemi Honibar aonung sangdong ka agütsüba nung, tashiyim amshia "international borders" memelenshitsüla, ta

shia liasü. "Par tia shimtsü asoshi Ukraine mulung. Ozü linük temi yimtenren, mitkar aser senotsü tsütsü Ukraine maneni yaritsü," ta parnoki ashi. "Diplomatic solution" ya Ukraine kumzüka ayutsü atema kisüing masü saka Europe indang security asoshi kanga tongtipang lir, ta European lenirtemi ashir. Alaska senden nung European allies tem mejaokba asoshia khuret süa bilemba lemsateper. France Tir Emmanuel Macron-i Honibarnü X post ka nung, "Solution nung Europeans tem shilem alitsüla, kechiaser parnok indang security-a lendong nung lir," ta zülua liasü. Deobarnü Zelenskyy-i par tembar linüktem dang parnok teyari asoshi pelaba lemsatepa liasü. "Rara tembangba ya ajak asoshi tajung asütsüla, aser Ukraine nung yimjung asoshi Ukraine aser ozü nüburtem den tanü nokdaker ajunga dang kanga pelar, koba asen European linüktem indang security kumzüka ayutsü asoshi

lir," ta pai ashi. Zelenskyy-i Honibarnü Macron den phone ajanga jembidang, Russia nem tanaben shingameküla k o k d a k t s ü t s ü tongtipang, ta shia liasü. "Rara tembangtsü aser Ukraine aser danga European linüktem asoshi security foundation tejangja aser tajung asenok ajaki nüngdaker," ta Ukraine tiri ashi. Joe Biden-i 2021 küm June ita Geneva nung Putin ajuruba sülen Alaska nung senden ya tang US aser Russia tir teinyakdak ana tsüngta senden mezüngbuba alitsü. Alaska ya 1867 küm Russia-i US dang ayok. Biden aser Putin ajuruteper ita toku lir Moscow-i par sepaitem Ukraine arütsü alema yok. 2022 küm Kremlin-i Ukraine nunger region pezü - Donetsk, Lugansk, Zaporizhzhia aser Kherson agiogo ta sangdong, ajisüaka parnoki item tesem ajungabo mazüokteti liasü. Moscow-i tang tashi takok balaka tulubo monguteti lir, saka Ukraine anüdoklen tesem tuluka agia lir.

U19 Asian Boxing C'ships: Nisha, Muskan, Rahul nungeri gold angu



Luroi/August 10, 2025 (Agencies): Bangkok, Thailand nung Deobarnü U19 Asian Boxing Championships 2025 tatembangbuba anogo India tsür finalist tenet rongnungi anati gold medal nguteta liasü.

Nisha (54kg) aser Muskan (57kg) nati pei tata asaya split decision agi akokba sülen gold medal nguogo.

Deobarnü mezüngbuba asaya nung taoba mapang Junior World Champion, Nisha-i, China tsür Sirui Yang kanga junga koka tenzük, saka Muskan-ibo final nung Kazakhstan tsür Ayazhan Ermek tera agi dang koka liasü.

Kasa mapang nung Vini (60kg), Nisha (65kg), Aarti Kumari (75kg), Kritika

Wasan (80Kg), aser Prachi Tokas (80+kg) nungeri final

asaya makokba sülen silver medal dang ngua liasü.

Vini aser Aarti na unanimous (0-5) decision agi tamakok angu, ajisüaka Nisha bo kanga toktepba asayar split (1-4) decision agi Japan tsür Arinda Akimoto-i koka liasü.

Kasa mapang nung heavyweight boxer, Kritika aser Prachi nata 2-3 ta split decision agi tamakok ngua liasü.

Teburtem rongnungi Rahul Kundu (75 Kg) kijai gola medal ngua liasü. Mausam Suhag (65 Kg) aser Hemant Sangwan (90 Kg) nata final nung tsüka liasü.

International asayamung nung asemben atonga silver dang anguba sülen Rahul-i Uzbekistan nunger asayar Muhammadjon Yakuboev 4-1 agi koka Asian U19 title benogo.

U19 Asian Boxing C'ships

nung India nunger medal angurtem:

Gold - Nisha - Women's 54 Kg
Gold - Muskan - Women's 57 Kg

Gold - Rahul Kundu - Men's 75 Kg

Silver - Vini - Women's 60 Kg

Silver - Nisha - Women's 65 Kg

Silver - Aarti Kumari - Women's 75 Kg

Silver - Kritika Wasan - Women's 80 Kg

Silver - Prachi Tokas - Women's 80+ Kg

Silver - Mausam Suhag - Men's 65 Kg

Silver - Hemant Sangwan - Men's 90 Kg

Bronze - Yakshika - Women's 48 Kg

Bronze - Akansha Phalaswal - Women's 70 Kg

Bronze - Shivam - Men's 55 Kg
Bronze - Gaurav - Men's 85 Kg.

India team AFC U20 Women's Asian Cup atema qualify süogo

Luroi/August 10, 2025 (Agencies): Deobarnü Thuwunna Stadium, Yangon nung goal 1-0 agi Myanmar akokba sülen India U20 women's national team AFC U20 Women's Asian Cup atema qualify süogo. Küm 20 sülen India team tang mezüngbuba iba asayamung atema qualify süogo.

Group D nung India team-i point tenet ngua parnok temaba jenjang nung tembanga liasü. Deobarnü group stage nung tatembangbuba asaya nung winger Pooja-i minute 27buba nung goal ka idaktsüba sülen parnoki asaya koka liasü.

Asaya nung mezüngbuba shilem ya India-i amokbanger asaya saka asaya tanabuba shilembo Myanmar-i azüoka asaya liasü. Neha aser Sibani Devi Nongmeikapamnati tetenzük nungi kanga junga sendaktepa asaya aser minute 3buba nung mezüngbuba goal tera agi dang midaktsü.

Asaya nung Myanmar team-i pressure kanga junga agiteta asaya aser parnokia ishiben counter attack asü aser minute 9buba nung Yin Loon Eain-i agütsüba ball ka forward Su Su Khin-i kanga junga agizüka goal idaktsütsü merang saka midaktsütet.

Myanmar team-i tanem tanemi tajungba asaya tenzük saka minute 30 ajungtsü lia Pooja-i India atema goal ka idakja liasü.

Iba goal idaktsüba ajanga India team anisüngzükdaktsü aser parnok tejakdang sür asaya mezüngbuba shilem tembanga liasü.

Ajisüaka asaya tanabuba shilem ya khenyongi balka liasü. Kidang fan temi pusema Myanmar team-i asendenshir kanga nongshia asaya tenzük aser India goalkeeper Monalisha Devi-i minute 48buba nung Su Su Khin-i metsüba ball ka kanga junga nokdanga liasü.

Myanmar-i maneni goal

idaktsütsü asoshi nongshia asaya saka India team-ia kanga ajanga defend süa liasü. Iba sülen Myanmar substitute Moe Pwint Phyu-i ball ka tongoktsüba tera agi dang mai India goalkeeper-i nokdanga liasü.

Maneni minute 90buba nung Phyu-i metsüba ball ka goal post nung ondaka liasü. Myanmar team-i kanga nongshia asayaka India team-ia kanga junga nokdanga goal ka yagi asaya koka küm 20 sülen parnok tang mezüngbuba iba asayamung atema qualify süogo.

India U20 tetsür team: Monalisha Devi Moirangthem (GK), Remi Thokchom, Thoibisana Chanu Toijam, Arina Devi Nameirakpam, Neha Pooja, Sibani Devi Nongmeikapam, Shubhangi Singh (C), Anju Chanu Kayenpaibam, Cindy Remruatpui Colney, Sulanjana Raul.

Cincinnati Open: Sinner, Sabalenka, Swiatek tanabuba round-i iogo

Luroi/August 10, 2025 (Agencies): Cincinnati Open nung tebur aser tetsür kija asaya defending champions Jannik Sinner aser Aryna Sabalenka nati Deobarnü mezüngbuba round nung pei tata asaya kokogo.

Tebur kija asaya nung Sinner-i, Colombia nunger asayar Daniel Elahi Galan 6-1, 6-1 agi straight sets nung akok aser Sabalenka-ia 7-5, 6-1 agi Marketa Vondrousova koka liasü.

Sabalenka-i mezüngbuba set tatembangbuba game nung Marketa indang serve ka break süa asaya akok aser tanabuba set nungbo Marketa nem game ka dang kokdakja liasü.

Sabalenka tanabuba round nung Emma Raducanu den asayatsü, shibai 6-3, 6-2 agi Olga Danilovic kokogo.

Kasa mapang nung Sinner-i Colombia nunger asayar den asaya nung winners 17 angu aser unforced errors pezü dang

mena liasü. Sinner-i mezüngbuba game pongu ya minute 15 nung dang koka liasü.

Kasa asayamung nung Benjamin Bonzi-i 5-7, 6-4, 7-6 (7/4) agi eighth-seeded Lorenz Musetti akok aser Artur Rinderknech-i 6-7 (5/7), 6-4, 6-2 agi 11th-seeded Casper Ruud koka liasü. Asaya nung Ruud-i unforced errors 34 mena liasü.

Maneni Holger Rune-i mezüngbuba round nung 7-5, 7-6 (7/5) agi Russia nunger asayar Roman Safiullin kokogo aser pa tanabuba round Alex Michelsen den asayatsü, shibai Corentin Moutet 3-6, 6-3, 6-4 agi koka liasü.

Tetsür kija asaya nung Wimbledon champion Iga Swiatek-i mezüngbuba round nung Anastasia Potapova, 6-1, 6-4 agi kokogo.

Australian Open koker alila Madison Keys-ia 1-6, 6-3, 7-6 (7/1) agi Germany tsür Eva Lys kokoa tanabuba round-i iogo.

Inigo Martinez Al Nassr nung denogo



Luroi/August 10, 2025 (Agencies): Spain nunger defender Inigo Martinez, La Liga champions Barcelona nungi Saudi Pro League club Al Nassr nung denogo.

Arishi küm 34 tain centre-back ya 2023 küm Athletic Bilbao nungi Braca nung oa adenba sülen pa club nungi 71 ben asayaogo.

Taoba season Barca puri La Liga akokba aser iba masüdag taoba küm Spanish Super Cup aser Copa Del Rey koka asayaba mapang pai club nem teyari tulu agüja liasü.

"Official Spanish defender Inigo Martínez #AlNassr nung free agent ka ama denogo," ta Saudi Arabian club yagi tenangzüktepba yangluba sülen social media ajanga metetdaktsü.

Martinez ya taoba mapang season tenet tashi Real Sociedad nungi asaya aser iba sülen Bilbao nung küm trok asaya. Kasa mapang nung pa 2013 nungi 2023 küm tsüngda Spain team nungia 21 ben

asayaogo.

Martinez-i club toktsür aoba ajanga Barca atema asayar nem taah agütsüba nung mepetmesü adoker aliba asoshi lenmang lapoktsütsü.

Al Nassr pur taoba season Saudi Pro League nung tasembuba jenjang nung tembang aser parnok rongnungi Cristiano Ronaldo-i goal 25 idakja pa ajak dang goal timtiba idaktsüba asayar liasü.

Kasa mapang nung Paris Saint-Germain-ia France nunger goalkeeper Lucas Chevalier, euro million 40 agi alizükogo.

Club tir Nasser Al-Khelaifi-i, pa alizükba atema pelaba club website ajanga lemsatapa den pa den 2030 küm tashi tenangzüktepba yangluogo, ta ashi.

Chevalier ya France indang squad balala nung züngoksemer aruogo, saka pa tang tashi senior team nungi khien danga asaya mali.

Kasa mapang nung PSG-i Champions League, Ligue 1, aser French Cup akokba mapang Italy nunger nüngtugu asayar Gianluigi Donnarumma goalkeeper liasü aser pa nem Russia nunger Matvey Safonov aser Spain nunger Arnau Tenas nati teyari agüja liasü.

PSG puri tang transfer window nung alizükba golkeeper rongnung Chevalier ya tanabuba lir. Parnoki Renato Marin-a alizükogo.

BILEMDANGANG

"Nü teka tachichleni kechi inyaker aji tabelen nem temetetdaktsü."